




Ó Am go hAm

Patricia Forde



**Ábhar Tacaíochta don Seomra Ranga**

## **Eolas faoin Leabhar**

**An tÚdar:** Patricia Forde

**Maisitheoir:** Lauren O'Neill

### **Patricia Forde**

Scríobhann Patricia Forde leabhair do dhaoine óga i nGaeilge agus i mBéarla. Tá an-chuid leabhar scríofa aici, leabhair pictiúr agus leabhair do pháistí óga agus do dhéagóirí. Is í Laureate na nÓg i mbliana í agus tá sí ag obair le Comhairle na nEalaíon agus le Leabhair Pháistí Éireann chun leabhair do pháistí a chur chun cinn agus chun léitheoireacht a spreagadh.

### **Clúdach an Leabhair**

Sula léann tú an blurba ar an gclúdach cúil, féach ar an bpictiúr ar an gclúdach tosaigh. Cad é ábhar an scéil seo, dar leat?

Léigh an cur síos atá ar chúl an leabhair. An leor an blurba sin le tuiscint a thabhairt do léitheoirí ar ábhair an leabhair?

Cén cineál scéil a bhfuil tú ag súil leis? Scéal eachtrúil? Scéal brónach?

### **Faoin Leabhar:**

Is scéal staire agus scéal amthaistil atá sa leabhar seo. An bhfuil scéalta eile den chineál seo léite agat i nGaeilge, i mBéarla nó i dteanga eile? Cad iad? Ar thaitin siad leat?

An bhfuil aon eolas agat ar na Lochlannaigh agus ar a dteacht i dtír in Éirinn?

### **Téamaí an Leabhair:**

**Draíocht/ Amthaisteal:** Tá draíocht ag baint leis an scéal seo nuair a thugann Aoife cuairt ar an tseanmhainistir agus nuair a théann sí siar in am go dtí an bhliain seacht gcéad nócha naoi.

**Cairdeas:** Tá cairdeas idir Aoife agus Éanna agus tugann sé cabhair agus aire di.

**Teannas:** Tá teannas sa scéal seo, tá Aoife ag iarraidh filleadh ar an aonú haois is fiche agus ar a teaghlach agus a cairde.

### **Cuid a hAon**

Cén post atá ag máthair Aoife? Cad a dhéanann duine a bhfuil an post sin aige?

Cad a tharlaíonn idir Aoife agus na buachaillí? Cén fáth a bhfuil siad leis an oíche a chaitheamh sa tseanmhainistir?

### **Le plé sa rang:**

Cén post ba mhaith leat a dhéanamh nuair a bheidh tú fásta suas?

An dóigh leat gur post maith é an post atá ag máthair Aoife? An dtaitneodh an post sin leat? Cén fáth?

### **Cuid a Dó**

#### **Cúpla ceist faoin téacs:**

An réitíonn Aoife lena deartháir Ruadhán? An bhfuil deartháir nó deirfiúr níos óige agat? An réitíonn sibh le chéile? An bhfuil na caithimh aimsire céanna agaibh, nó an bhfuil siad éagsúil?

### **Le plé sa rang:**

An dóigh leat go bhfuil an ceart ag Aoife dul go dtí an mhainistir? An ndéanfá an rud céanna nó a mhalairt?

### **Cuid a Trí**

#### **Cúpla ceist faoin téacs:**

Cad a thugann Aoife faoi deara nuair a mhúsclaíonn sí an mhaidin dár gcionn?

Cuireann an Bráthair Liam é féin in aithne d'Aoife. Cén t-ainm a thugann sé ar Aoife?

Cén míniú atá ag an mBráthair Liam maidir le hAoife/ Fionn bheith chomh ciúin sin? (Ich. 15).

Cén bhliain é?

### **Le plé sa rang:**

An gcreideann tú in amthaisteal? An dóigh leat go bhféadfadh a leithéid tarlú? Cén tréimhse ama ar mian leat féin taisteal siar chuici?

### **Cuid a Ceathair**

#### **Cúpla ceist faoin téacs:**

Déan cur síos ar an gcairdeas idir Aoife/ Fionn agus Éanna.

Cén áit ar féidir le hAoife dul le teacht ar réiteach na faidhbe agus ar thuiscint níos fearr ar an saol agus ar an mbrionglóid seo? Cad é do mheas?

### **Cuid a Cúig**

#### **Cúpla ceist faoin téacs:**

Déan cur síos ar na bealaí atá ag na manaigh leis na pictiúir a dhathú.

Cén chúis atá ag Aoife/Fionn bheith chomh imníoch sin?

Cad a tharlaíonn idir Éanna agus Fionn ag deireadh na caibidle?

Cad a tharlaíonn idir Éanna agus Aoife ag deireadh na caibidle?

#### **Le plé sa rang:**

An bhfaca tú lámhscríbhinn riamh? Cad iad na lámhscríbhinní is cáiliúla atá againn anseo in Éirinn? Cá háit a gcoinnítear iad? Cén fáth?

### **Cuid a Sé**

#### **Cúpla ceist faoin téacs:**

Cén cruthúnas atá ag Aoife gur tháinig sí ón todhchaí? An gcreideann Éanna í?

Cad a insíonn Aoife d'Éanna faoin todhchaí?

#### **Le plé sa rang:**

Cad iad na ceisteanna a chuirfeá ar dhuine ón mbliain seacht gcéad nócha naoi (éadaí, bia, lóistín, caitheamh aimsire).

Cad iad na ceisteanna a chuirfeá ar dhuine ón todhchaí dá dtiocfadh siad siar go dtí an bhliain seo?

## **Cuid a Seacht**

### **Cúpla ceist faoin téacs:**

Tá na Lochlannaigh ag teacht chun ionsaí a dhéanamh ar an mainistir. An bhfuil aon eolas agat ar na Lochlannaigh? An bhfuil iarsmaí/ fothracha staire i do cheantar féin? Má tá, cén tréimhse ama lena mbaineann siad?

Cad é an plean atá ag Aoife le cabhrú leis na manaigh agus leis an mainistir? (lch. 36)

### **Le plé sa rang:**

Cén leigheas a thugtar don fhear bocht atá ag fulaingt? (lch. 34) An bhfuil aon eolas agat ar leigheas nó ar luibheanna a d'fhéadfaí a thabhairt do dhuine atá tinn?

## **Cuid a hOcht**

### **Cúpla ceist faoin téacs:**

Cad a deir Aoife leis an mBráthair Macha?

An gcreideann sé Aoife agus Éanna?

Cad a dhéanann Aoife? (lch. 40)

### **Le plé sa rang:**

Conas mar a bhraith tú agus tú ag léamh an phíosca seo den scéal? Cén bealach, nó stíl, atá ag an údar chun teannas agus atmaisféar a chruthú don léitheoir?

## **Cuid a Naoi**

### **Cúpla ceist faoin téacs:**

Cad é an míniú atá ag Aoife agus Éanna ar an teorainn idir an t-am seo agus an todhchaí?

Cad a dhéanann siad an oíche sin? Cén chríoch atá leis an eachtra?

An gcreideann an Bráthair Liam iad?

Cad a dhéanfaidh na manaigh Oíche Shamhna? Cén fáth?

### **Le plé sa rang:**

'Chuala Aoife liú fíochmhar na Lochlannach agus iad ag déanamh ar an mainistir'. Cad a dhéanfaí féin sa chás seo?

## Cuid a Deich

### Cúpla ceist faoin téacs:

Cad a dhéanann Aoife agus Éanna?

Cad a tharlaíonn agus iad ag iarraidh éalú ó na Lochlannaigh?

### Le plé sa rang:

Tá an-chuid eachtraíochta sa chuid seo den scéal agus Aoife agus Éanna ag iarraidh éalú ó na Lochlannaigh. Ar thaitin an chuid seo den scéal leat? Cad iad na mothúcháin a bhraith tú agus tú ag léamh?

## Cuid a hAon Déag

### Cúpla ceist faoin téacs:

Cá háit a dhúisíonn Aoife? Cé atá os a comhair amach?

Insíonn Aoife an scéal dá máthair agus taispeánann sí an phluais agus Lámhscríbhinn Uí Néill di. Cad é an fhianaise atá ag Aoife gur tháinig Éanna slán?

Tá taighde agus tionscadal staire le déanamh ag Aoife agus a máthair. An ndearna tusa tionscadal staire riamh agus má rinne, cén t-ábhar taighde a bhí agat?

### Le plé sa rang:

Ar chreid tú an draíocht a bhain leis an scéal seo? Ar thaitin an t-amthaisteal leat?

An dtaitníonn scéalta den chineál seo leat? An bhfuil scéalta nó scannáin eile feicthe agat (Gaeilge, Béarla, teanga eile) ina dtarlaíonn a leithéid d'amthaisteal? Cad iad?

## Sa Seomra Ranga

1. **Léigh siar agus tarraing** pictiúr de na carachtair éagsúla atá sa scéal – Aoife, Éanna, an Bráthair Liam agus na manaigh.
2. **Machnamh agus Plé** An bhfuil scéalta eile faoi na Lochlannaigh cloiste agat? Cad as ar tháinig na Lochlannaigh agus cad a bhí ar siúl acu in Éirinn?
3. **An pictiúr ar an gclúdach** Ar thaitin an pictiúr ar an gclúdach leat? Déan iarracht clúdach eile a dhearadh le haghaidh an scéil seo.

4. **Taighde agus Tionscnamh** Déan taighde ar do cheantar féin nó ar thionchar na Lochlannach ar logainmneacha na hÉireann
5. **Scribhneoireacht Chruthaitheach:** Samhlaigh gur tusa Aoife; scríobh cur síos ar an mainistir agus ar an eispéireas a bhí agat agus tú ag taisteal siar in am. Bain úsáid as do chuid céadfaí (chuala mé, chonaic mé, mhothaigh mé, bhlais mé, bholaigh mé).
6. **Scribhneoireacht Chruthaitheach:** Samhlaigh gur tusa Éanna; scríobh cur síos ar an lá a bhí agat nuair a chas tú le hAoife. Bain úsáid as do chuid céadfaí (chuala mé, chonaic mé, mhothaigh mé, bhlais mé, bholaigh mé).
7. **Scribhneoireacht Chruthaitheach:** Samhlaigh an comhrá a bheidh idir Aoife agus Ruadhán nuair a inseoidh sí dó céard a tharla di agus í imithe siar in am.
8. **Amthaisteal** An bhfuil tréimhse faoi leith staire ar mhaith leat taisteal siar chuici? Cén fáth? An mbeadh eagla ort agus tú ag taisteal in am? Cad iad na buntáistí agus na míbhuntáistí a bhainfeadh le hamthaisteal, dar leat?

